

Tony Pua: Hasil kaji sedilik bukti Putrajaya tidak serius tangani rasuah
Malaysian Insider
July 10 , 2013
Oleh Mohd Farhan Darwis

Kerajaan tidak serius membasmi rasuah dan rakyat Malaysia kian muak dengan dongengan pakej Bidang Keberhasilan Utama Negara (NKRA), kata Tony Pua (gambar).

Selepas tiga tahun NKRA, Ahli Parlimen Petaling Jaya Utara itu, berkata jenayah di Malaysia semakin teruk dan berleluasa.

"Rakyat berharap dapat melihat hasil NKRA selepas tiga tahun, namun tidak banyak perubahannya.

"Terlalu sedikit golongan kaya, berkuasa dan mempunyai hubungan politik yang dihukum," katanya pada kenyataan media lewat malam tadi.

Kenyataan itu mengulas hasil kaji selidik terbaru Transparency International (TI) yang mendapati rakyat Malaysia kian hilang keyakinan terhadap usaha kerajaan bagi membanteras gejala rasuah.

Badan bukan kerajaan (NGO) antarabangsa itu mendapati kepercayaan rakyat merosot kepada 31 peratus tahun ini berbanding 49 peratus daripada 1,000 responden pada 2010.

Pua kesal kerana peruntukan tahunan Suruhanjaya Pencegahan Rasuah Malaysia (SPRM) semakin meningkat tetapi tidak membuah hasil memberangsangkan.

"Kita berada pada kedudukan terbaik sedekad lalu dengan bajet RM67.7 juta. Ketika berada di kedudukan 47 dari seluruh dunia ketika zaman Tun Abdullah Badawi, kita guna bajet berjumlah RM146.7 juta.

"Pada 2012 selepas 'pembaharuan besar-besaran SPRM' dan tambahan bajet RM211.2 juta, kita beroleh kedudukan 56 dariseluruh dunia," katanya.

Secara sinis, beliau berkata, semakin besar bajet diberi kepada SPRM, semakin rakyat Malaysia korup.

Kaji selidik TI-M itu turut mendedahkan polis dan parti politik sebagai institusi yang paling korup di negara ini. - 10 Julai, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/hasil-kaji-sedilik-bukti-putrajaya-tidak-serius-tangani-rasuah-tony-pua/>